

Ihm sei Läwenselixeer

Alder Krauderer,
Raubauz, Knodderer!
Dodelich dohergedormelt,
gekeicht, geschnauft, geschlabbt
met sackschwere Fieß,
schloggriche Bejn,
drurlichem Deez
uff sei Bank bei de Scheier.
Krummgeschafft, mied, daddrich, lärich...
Daa fa Daa die elend Leier.

Klejnes Trutschelche,
Hurrass, Schinnosjel
Dabberche dohergehossert,
gedibbelt, gedäbbelt, gehubbst
met Speckstrambelcher,
Schoges im Sinn.
Beim Da-da-gehn
queggerche devungehuscht.
Wingge-wingge Richtung Scheier...
Nix wie pralli Läwensluscht.

Gu'mo dabber hien!
Kinnerschnissje, sießschmeerbabbich,
säwernass beim Schmatzergewwe.
Klitzeklejne Batschelhändcher
däddschele, dun Ei-a-mache,
zobbele de Urgroßvater
allewei redour ins Läwe.
Driwwe huckt er, ääs denäwe.
Schäbb sinn alle zwää
- vor Lache!

*Renate Demuth,
Kaiserslautern*



Wäuscht noch

Wie schää war's noch vor värrzisch Johr,
Noot hot mer sich bloß in de Hoor,
Wann se doch ging wär's net verkehrt,
'S Geld wär widder mähner wert,
Grad due was ma wolle däät,
De Herr im Haus vun frieh bis spät,
Hättscht grad genuch mit äägne Sache,
Un net: Des mischt mer aa noch mache!
'S Esse hot oft eh net g'schmeckt
Die Stumbe hot se als versteckt,
Un rääse kennt mer aa allää,
Mit annre Leit wär's aa mol schää,
Sich uurasert nooch drauße waache,
Uff Sogge frech Sandale trache.
Gängscht mol, wenn'd Luscht hättscht, außer Haus,
Im Bett is eh de Offe aus.

Jetzt därfst der selwer Briefe schreibe,
Mit Rätsle der die Zeit vertreibe,
Mit der verzehle, greine, lache,
Der äägene Gedangge mache,
Im Park allää im Kreis rundabbe,
Im Fernseh ruff un runner zabbe.
Am Disch halt nimmi dischbediere,
Un iwwer nix kää Wort verliere.
Ehr Grumbeersupp war net verkehrt,
Die Lung kerng'sund, des war's schun wert.
Ich seh ehr Bild, do kurimt mer's grad:
De Woi schmeckt heit allää so fad!
Moi Wund will uhne Pfleg net heele,
Ich glaab, sie wärd mer arrisch fehle!
Moi letschdes Geld gäb ich fer her,
Wann se noch äämol bei mer wää!

*Lothar Friedrich,
Ludwigshafen*

